

Lily Marval:

Violencia, esclavitud y discriminacion (Parti 1)

Violencia, esclavitud y discriminacion ta existi hopi siglo caba. Miho bisa, desde cu e ser humano a cuminsa pobla nos tera. E testament bieu ta yen di violencia, pero mi ta menciona un cu a yama mi atencion como cu e tin di haber cu mi estudio/investigacion tocante violencia contra hende muhe.

Esaki bo por lesa den e buki di huesnan y ta trata di violencia y intencion di violacion di un levitico, cu pa salba su mes ta entrega su concubina na e grupo di homber cu tabata buscando e levitico, di e tribu di Levi, pa viol'e. E ta hasta bisa nan "bay cune y haci loke boso kier cune". Y esey e grupo di homber a haci, loke awe nos ta yama "gangrape" y nan a laga e muhe casi morto dilanti di e cas unda su pareha tabata hospeda. Mi no ta cont'e tur pasobra e ta basta largo. Por fabor, busk'e y les'e.

Historia ta conta nos di esclavitud na e palacionan Romano y Griego y abuso fisico y sexual tanto contra hoben, hende muhe y hende homber. Especialmente abuso sexual ta muestra di poder riba otro ser humano cu ta ser considera inferior. Den siglo medio of edad media, violacion tabata un castigo di guerra y e pueblonan konkista tabata ser viola of uza como catibo. Pa hopi siglo violencia a domina e escenario. Ken no ta corda rey Arturo y e cabayeronan di mesa rondo? Tur hende tabata considera nan como heroe. Ken no a tende di Robin Hood y el Zorro cu tabata defende hende pover contra e malvadonan cu tabata oprimi e pueblo. Y pa hacie mas bunita: bo a yega di wak peliculanan di Walt Disney manera Sneeuwwitje (Blanca Nieves) y the Beauty and the Beast? Bo a yega di ripara cu ta trata di un "pelea" entre e hende bon y e hende malo? Y si no tabatin e heks (bruja) den e storia, lo bo no a gusta e storia pasobra e storia lo tabata laf! Di e manera aki nos a siña cu e bon ta triunfa y e malo ta ser castiga of mata. Den bida real e realidad di e opresion y violencia contra e pueblo tabata hopi mas cruel. Den testament nobo ta aparece un homber yama Hesus, yiu di Dios, manda pa dios pa salba mundo. En realidad Hesus ta rebeldia contra e poder di Roma cu tabata goberna



henter pueblo hudiu y otro pueblonan den su alrededor. Pero Hesus tabata expresa su disgusto na un forma pacifico dor di predica cu nos mester stima otro manera tata celestial ta stima nos y hasta stima nos enemigo. Pakico anto un homber manera Hesus cu tabata sana enfermonan y hasta lanta hende for di morto, a ser mata di un manera asina cruel?? Aha, pasobra el a critica su propio sacerdotenan (lesa e parabola di e bon Samaritano) y el a yama e sumo sacerdote Kaifas un corrupto. Boso ta reconoce e palabra ey? Kaifas a cuminsa haya miedo di Hesus pasobra hopi hende tabata sigui Hesus y Kaifas a haya e pensamiento cu Cristo por a forma un grupo di hende asina grandi cu no solamente por a core cune pero hasta cu e representantenan di e poder di rema, e Cesar y e gobernador. Pues el a traha su plan pa kita Hesus for di caminda y como e hudionan no tabatin ningun autoridad politico, Caifas mester a acudi cerca e Romanonan pa captura Hesus y conden'e. Pa e haya hende pa grita pa crucifica Hesus el a paga un grupo di hendenan hudiu pa pidi Pilato pa crucifica Hesus. Ta zona conoci? E resto di e storia ey nos tur sa.

Ban tira un bista riba Merca. Un grupo di habitantenan di Europa, specialmente In-

glatera a cuminsa emigra pa e colonia di Inglatera cu awe nos conoce como estadonan uni di America. Exactamente, e gran pais yama 'United States of America' tabata un tempo un colonia di Inglatera. E emigrantenan aki, yama 'the founding fathers', a establece nan mes na e parti di e costa oriental y poco poco a cuminsa actua independientemente di Inglatera. Ora Inglatera a dicta cu tur comercio haci dor di e grupo aki, mester a pasa prome via Inglatera, un grupo di comerciante a protesta contra esaki y a prefera di tira e saconan di blachi di te den lama: e asina yama Boston Tea Party. Nan a cuminsa lucha pa nan independencia, bou liderazgo di George Washington y nan mes a declara nan mes independiente na 1776. No lubida cu ora nan a cuminsa apodera di e teranan na Merca, nan a discrimina y pusha e indjannan nativo den "reservations", areanan reduci y reserva pa obliga e diferente tribunan indjan pa nan biba eynan. Te dia di awe e indjannan, nan ta yama nan mes e 'native americans', e nativonan, pasobra nan ta e berdadero propietario di e teranan ey. Nan ta sigui cultiva nan idioma, cultura y artesanian pa no perde nan propio identidad. Y nos por a lesa con nan a protesta contra pasamento di tubonan grandi pa trans-

porta petroleo riba terenonan cu pa e tribunan indjan ta sagrado.

Nos tur a yega di tende di e konkista di paisnan centro y sur-Americano pa e Spañonan y Portuguesnan. Y tambe di konkista di paisnan manera indica pa e Inglesnan, konkista di sur-Africa y di Indonesia pa e Hulandesnan. Y pa nos no lubida Aruba, Corsou, Bonaire, Saba, Sint Maarten y St. Eustatius. Na Corsou, Tula, un esclavo, a lanta pa su derechonan y el a ser tortura y mata. Na 1863 esclavitud a ser aboli riba papel pa Antias Neerlandes. Di tur e paisnan konkista nan a horta especienan, mineralnan, sucu, salu, oro, plata, diamanta, catuna, piesanan di arte. Demasiado pa por menciona tur. Como e konkistadonan no a haya gran cosa riba nos islanan, cu awe ta carga e number di islanan Hulandes, nos islanan a ser batisa cu e number di "islanan inutil".

Nos tur conoce con e nativonan di e continente Africano a ser secuestra for di nan pais y nan famia, bati, maltrata y negocia cu doñonan di plantacionnan na Brasil, Surinam, Corsou, Cuba y Merca. Nos tur conoce e horornan cu a ser cometi contra e hendenan aki pa e hende blanco por a sigui abusa di nan pa nan bira rico. Aki nos ta papi-

ando di secuestro, traficacion di hende, tortura di hende basa riba discriminacion.

Kico ta pasando na Merca awor? Maske e constitucion di Merca ta menciona cu tur hende naci riba su territorio ta igual y tin e mesun derecho, den practica esaki nunca tabata e realidad. E autor di proclamacion di independencia y di e constitucion di Merca, Thomas Jefferson, tabatin un concubina color scur, scondi, cu ken el a haya varios yiu. Martin Luther King, un predicado Cristian, a protesta pacificamente, sin violencia contra e discriminacion aki.

Den su famoso discurso "I have a dream" e ta conta di su soño unda cu tur hende di tur color ta sinta hunto manera ruman y ta respeta otro. E tabata pidi pa Derechonan Igual (Equal Rights). Nan a batie, scupi den su cara, y secuestr'e pa spant'e. Kende tabata causa e terror aki? E asina yama Ku Klux Klan. Kende tabata nan miembronan? E obreronan blanco sin of di poco educacion bou liderazgo di polis y hefenan di polis. P'esey nan tabata tapa cara.

Nota di redaccion: Parti dos lo continua den nos edicion di mañan.